

Basef Amama Pol Nali' Nanda'am Mafe'ma Timoti

Basef bandami Pol nali' nanda'am mafe'ma Timoti

- 1:1-2 Pol na'i God noloma Jisas Krai migiambama Timoti
1:3-20 Pol na'ipa Timoti ma nitu la'ifina ma amam mambaso'ami,
ma'ipasa basef la'ifimi sila waf fowa'inai
2:1-15 Waf bu'unai esis Kristen sanda' lotuwanai
3:1-16 Waf amam agufumi ma sios manda'anai maloma waf amam
magiambama agufumi ma siosi manda'anai
4:1-6:21 Pol na'ipa Timoti ma waf hianai bu'unai anan nonda'ana
nigiambama esis Kristen hiesi
-

1 ¹Ae' Pol anda' basef amama. God nofa' ape' motanimani mope andeande' ea' mape mohafa anona nemaf miti Krai Jisas mope molomana. Amam biam mandandepa ma'ipi basef la'ifimi ma ape aposel Krai Jisasi.

²Ae' anda'menago basef amama ine' Timoti, ine' nembale'efa God dei' nataga nogalome ae'inai endilisi. Ae' a'i God noloma Krai Jisas dembinai afa'inai miti uwahipina migiambamena na'a monda'ena netaga la'ifina ma bale'ef, opaf ine'inai nope awanena.

Ape' mohagofa basef baso'maimi hiami

³Fowa' ae' afo'o etap hiagoma Masedonia ma a'ipina dei' na'ama etin a'ipina wapoti'. Ine' ata' nepe la'ela'ef na'ama Efesusa ni'ipa anom amam mehpa ina mi'ipasa anom basef baso'maimi, owa'. Mi'ipasa basef Godi atom. ⁴Ni'ipasam mokwaha basef fowa'imi wafimi, basef mamumami hiami ma'i agof amama bafapas ehasas asasisi. Basef amama mamboma ukup amamumi mafela ukup amamumi ma'i basef mandahihianamam. Amam amama ina manda' maol Godi mataga la'ifima bale'ef, owa'. Maol anama Godi natagama bale'ef atona.

⁵Ea' mi'uli anama dei' a'ipinanai, i'i esis sombale'efana silana, basef mape opalef nomoni ma'iami ma'ipas mihi'ambasa waf esis sanda'anai

ina aona, owa'. Esis sombale'efa God endilisi. Ama nambimb waf anama hianai nefela ukup asasimi mimila God noloma enis epes wapoti'. ⁶Ea' anom amam ukup mase'ama waf anama bu'unai. Ea' dei' mamboma basef bu'wami ma'i basef wafimi atom. ⁷Amam ma'i mopoma tisa mowalipasa mi'uli Godi si'i anom dembemi tisa ma'i, "Basef afa'imi endilisimi atom." Ea' amam ina mogawa basef amama ma'iami mogawa ofagema, owa'.

⁸I'i afa' ogawa mi'uli Godi wilana, na'ama andeande'. ⁹Afa' ogawa amama wapoti', mi'uli anama ina nafi'mai epes isima sape andeande', owa'. Anama nafi'mai epes sanda' waf aonai, sosambala mi'uli anama owa' sope owina amam agufumi. Ea' enis seso' alafugaha Godi sanda' waf aonai. Enis sa'i waf Godi hapainai, ma saila waf etapanai atona. Ea' enis saha ahapas mamasas saga', saha enis epes wapoti' saga'. ¹⁰Enis sanda' so'a wauli ma waf anama aonai, ea' enis sahambombaga enis amam nematawa si'i fowa' esis Sodom sanda'anai. Ea' enis sofa' enis epes safe' satalisa otamba sanda'masa maol. Ea' enis sambaso'ami, ea' enis sambaso'am sa'i basef endilisi gani ilif. Ea' enis sanda' waf anama naloma anona waf hianai aonai napa' naloma basef endilisimi. Mi'uli Godi nafi'i na'i epes isima sanda' waf aonai. ¹¹Basef amama mape basef bu'wami God nase'eam ae' ma ewalapam. Basef amama bu'wami ma'ipafa God bu'unai endilisi ofagonama danifel naloma mafifili.

Pol nanifela Goda nagiamamana na'a

¹²Dembina'i ape'inai Krai's Jisas nase'e pepel, okom napoma ae' bu'uwai anda' maol ananinai nanda'e anda' maol anama, ea' anifelona. ¹³Endilisi, fowa' la'ela'ef ae' anda' basef findiwami ma agel Ananinai, apa' aloma esis Kristen, anda' waf aonai ma Anan. Ea' ae' ina egawa andeande', owa' embale'efanai, ea' dei' anda' waf anama aonai ma anan la'ela'ef ape. Amama atom dei' nati uwahipiwi nagiambame. ¹⁴Dembina'i ape'inai nagiambame na'a nanda'e ataga la'ifiwi dei' embale'efana okom nainailana. ¹⁵Anom basef endilisimi atoma epes hiesi some'ama sombale'efam. Basef amama na'ama. Krai's Jisas nisila'i etap anae' ma nefa'ape epes manda' waf aonai nokwahomapana motanimani mape andeande'. Ae' ma'uwi ali' anda' waf aonai ikila' enis epes ea' ma'uwi ae' atowe. ¹⁶Amama atom dei' God nati uwahipiwi ali' ma Krai's Jisas na'i nih'iambasa Anan ina okom wandafunama ae' ulal, owa'. Ae' anda' waf aonai ikila' enis epes, ea' anan nape nohafa nogota launai ma etanima ifi'mai Anan. Ama owagama hiesi siti ae' ma esis wapoti' sombale'efana sofa' ambal namunai sope andeande' la'ela'ef. ¹⁷Anan dembinai King nape la'ela'ef. Anan owa' neaga'i, epes owa' la'ifisa sotolona. Anan atona God endilisinai. Ae' a'i agel lu'unai pepel nafifili mopoma Anan atona la'ela'ef. Endilisi.

Timoti nambimb nonda' wandaf la'ifinai noloma amam naumbih

¹⁸Nogalome ae'inai Timoti, dei' ase'enago basef amama nenda' maol. Ae' okom napoma basef Godi afagel nimbewa'inai amam profet Ambal Bu'unai Godi nafela ukup amamumi ma'ipinami. Ine' nila basef amama, nenda' wandaf la'ifina andeande' neloma esis naumbih. ¹⁹Wandaf anama ine' la'ifina nembale'efa God nenda' waf bu'unai andeande', ma basef mape opaf ine' nomoni ina ma'ipina anona waf aonai ine' nanda'anai, owa'. Enis epes soso' alafugaha waf anama bu'unai. Ea' dei' bale'ef asasinai aona si'i sip papalalana nail otamba aona nala naoh. ²⁰Epes sanda' waf anama, amam biam Himeneus naloma Aleksander. Bale'ef amamunai aona. Ae' andaiwa'mam ali'amonam mafe' lagof Satani ma mogawa gawa bu'unai. Anda'am na'ama amam ina monda' basef findiwama agel Godi, owa'.

Waf anama manda' betenanai

2 ¹⁻²Maol anama ae' a'i efela okom ine'inai nenda'ami, basef mali'i na'ama. Ipe' penda' betena God pihali'ana, pinifelona ma epes hiesi penda' betena anan nigiangama esis soloma amam king dembemi moloma gavman dembemi wapoti'. Ipe' penda' beten na'ama ma ape' hiapai mope opalef awanem, mila waf Godi bu'unai. ³Beten anama bu'unai ma naep Godi, notanima nofa' ape' mope andeande'. I'i ape' monda' waf anama monda' beten, Anan nondanifela ma ape'. ⁴Anan na'i nofa'ai epes hiesi sotanimamai Anan sope andeande'ma sogawa basef endilisimi ofagema. ⁵Ape' mogawa God atotona nape. Ea' anona aman nape la'afena God naloma epes, anama aman endilisinai anan Krai Jisas. ⁶Anan fowa' God nandandepana ea' nakwaha ambal ananai atona natala ape' epes hiapai nakwahomapa waf aonai motanimani. Nemaf anama dohamadohama Krai nihi'ambamapa God na'i nefa'ai epes hiesi sotanimani. ⁷Ea' dei' God nanda'e ape' aposela ewalapa basef bu'wami Ananimi. Ae' a'i endilisi, ina ambaso'am. Anan nanda'e ape' dembiwei tisa ma enis epes hiesi sololama Godi ma sombale'efa basef amama endilisimi.

⁸Ea' dei' ae' a'i epes hiesi wambel hiagoma sonda' beten. Ae' okom na'i esis hiesi sope bo'wes andeande', sokwaha ukup wandafumi moloma migimigah ea' sonda' beten.

Basef awo nematawai

⁹Ae' a'i awau nematawa wapoti' onda' luwaguf maim bu'wami atom, mondahama awau dende'. Ina onda'am bandabandam endilisi motambel nimbifah, owa'. Awau ina ola sosaf anama ofalo'ma balagah alop si'ina ombahigis mamumami hiami moloma sosaf gol bu'wami,

owa'. Luwaguf amama satalom otamba hiami otalom, hapaimi. ¹⁰Ea' nematawa wa'i basef wa'i ope awasi Godi, awau onda' maol bu'unai hianai naninani. Maol anama si'i sosaf awaunai endilisinai. ¹¹Maina nemaf ipe' penda' lotu, nematawa awau owalipama wila waf anama so'umbilinai ea' osopama malogofa ofa' basef andeande'. ¹²Ae' ina a'i aho'ma ano'w nemata'w kope dembe'wi tisa kope kwili' ma anona maol, owa'. Nematawa osopama malogof ome' basef atom. ¹³Basef ofagema mape na'ama. Fowa' God nali' nanda' aman Adam, ea' nanda' Iv kwagi'. ¹⁴Adam ina nombale'efa basef baso'maimi, owa'. Nemata'w kwambele'efa basef baso'maimi, ea' kwataga nemata'w kwanda' waf aonai. ¹⁵Waf nematawa onda'anai anama. Awo ombale'efa God endilisi ea' ukup mimila enis epes wigiambamas, ea' ope bo'owa andeande' umafi awau andeande' waf aonai a'awa.

I'i ombale'efa waf anama wilana la'ela'ef, God nambimb nokwahomawa waf aonai awau wanda'anai nofa'awa utanimani ope andeande'. Maina nogota ola awasi, nigiangamawa olas andeande'.

Basef amam mumafi siosi

3 ¹Basef amama endilisimi. I'i emi aman ni'i nope dembinai numafi esis Kristen sios, anan okom na'i maol bu'unai endilisi. ²Ea' emi aman nope numafi siosi nope andeande' endilisi ma epes ina siti anona waf aonai ma anan, owa'. Anan noso' nemata'w atoto'w. Ina nea' embel nohaga nogaol, owa'. Anan okom nopaina numafi alop ananinai andeande'. Anan nila okom bu'unai atona nonda' waf bu'unai hianai. Anan okom ni'i hiesi alupusi etis ananisi hi'ilas nose'as gwa'aimi. Anan nope notaga tisa bu'unai ma basef bu'wami atom. ³Ina nea' embel laifimi hiami, owa'. Ina okom wandafuna mehip, owa'. Nonda' epes sa'osa'ombemas. Ina nohas etin, owa'. Ina okom ni'ini'i ma otamba. ⁴Anan numafi awasi waulu'mana andeande' ea' nonda' awasi ananisi sila basef ananiami ma sonda' agel ananinai nope andeande'. ⁵Emi aman owa' numafi awasi soloma waulu'mana andeande', anan ina notaga nope agilinai numafi sios Godi, owa'. ⁶Aman anama nataga Kristen dambanai ina nope dembinai numafi sios, owa'. Na'ama nosambala basef Godi nogalo'mana si'i nagalo'ma aman aonai Satan. ⁷Aman agel bu'unai ma amam nematawa sololama Godi, aman anama notaga nope numafi sios. I'i anan owa' agel bu'unai, anan ambal aona ea' nofe' nuwis esag anama Satani nofa'ana.

Basef amama ma amam migiangama agufumi siosi

⁸Ea' na'ama etina amam amama magiangama agufumi siosi, amam ukup mope andeande'ma maol amamunai. Amam ina mi'i malogof biam, owa'. Ina mea' embel la'ifimi hiami endilisi mohaga mogaol, owa'. Ea' ina

mombaso'mas molomas mofa' otamba enis epesi, owa'. ⁹Basef amama endilisimi fowa' mandambahi'i dei' mataga mandawalap alihim, amam mombale'ef la'ifim. Ea' basef mape opalef nomoni ma'iami ma'ipam basef mihi'ambamam waf amamunai ina aona, owa'. Bo'ona. ¹⁰Pili' ata' piti maol amamunai. Ama piti monda'ana andeande', mope monda' maol siosi.

¹¹Ea' na'ama etina wauhiamam amamuwai ukup mopaiwa andeande'ma maol awau wanda'anai. Awau ina ondaha basefa enis, owa'. Ope andeande', ina wea' embel wainim la'ifimi hiami, owa'. Dendel onda' waf bu'unai atona. ¹²Amam manda' maol siosi, wauhiamam amamuwai ato'w etin. Amom mumafi awo oloma awasi amamisi andeande'. ¹³Amom mope monda' maola siosi, i'i monda' maol bu'unai, nambimb mofa' agof bu'wami. Ama la'ifim mowalapa basef bu'wami, mihi'ambas alihim amam mombale'efa Kraiss Jisas.

Basef ofagema ma waf Godi

¹⁴Endilisi ae' a'i efe'mago ine' mehip, ea' dei' ata' anda' basef amama mafo'mago ine'. ¹⁵I'i owa' efo'o etago ulal, ine' nitiago basef amama negawa waf anama esis sape andeande' ma wambota anama Godi. Wambota anama esis sios amam nematawa Godi ambal namunai napainai. Sios Godi si'i olaf la'ifinai nanda' basef endilisimi la'ifimi. ¹⁶Endilisi, basef amama ofagema lu'wami endilisi. Mandambaho' mape mafe' mafe' dei' God nihi'ambafam alihim. Basef amama na'ama.

Anan nataga epen endilisinai nofa' alop epesi nataga nandawalap. Ambal Bu'unai Godi nihi'ambapa ma anan aman bu'unai nape andeande'. Amam ensel Godi matolona. Basef ananimi sa'lipasam mafe'ma kantri naninani hianai amam nematawa hiesi sololama Godi sembale'efana. Ea' God nofa'ana nalata heven nape nafifili ananinai.

Basef amama ma epes sambaso'ami

4 ¹Ambal Bu'unai Godi na'i basef alihim na'ama. Anona nemaf enis epes sokwaha sambale'efa basef endilisimi Godi. Ea' seme' basefa epes isima ambagof awami mambaso'ami sila basef ambagof awami ma'iami. ²Anom amam mambaso'ami mawalipasa basef amama baso'maimi. Basef mape opalef asasimi nomon ma'iami mataga aom. Amam ina nambimb ata' momeme'ma waf aonai mogawana, owa'etin. ³Nambimb muwalipasa basef amama ma esis sihi'ama waf sandaso'amainai sihi'ama anom gwa'aimi epes sagwa'ami. Gwa'aimi amama God atona nanda'ama ape' epes mombale'efana mogawa basef endilisimi. Amama ape' mofa'am minifela God mogwa'am. ⁴Amamaga hiami God nanda'ami, bu'wami atom. Ape' minifelona, mofa'am, mogwa'am. Ina mokwahom, owa'. ⁵Dei' main, basef Godi maloma beten manda' gwa'aimi amama mataga bo'om andeande'.

Timoti nepe aman bu'unai nanda' maol Kraisi

⁶I'i ine' ni'ipasa basef amama esis Kristen alupusi, nambimb nepe epen bu'unai nonda' maol Kraisi Jisasi. Ea' nefa' pepel lu'unai ma basef mefela bale'ef ine'inai ma gawa bu'unai. ⁷Ea' esis amam nematawa sa'i numunefisa basef atom wafimi, newa' alafugamam. Ina manda'ena nelafa waf Godi andeande' negawam, owa'. ⁸Ine' negawa waf anama niwalipa alop si'ina nonda' maol alop neawi, amama la'ifim kwaikwaie' ma miyambamapa. Ea' ine' nelafa waf Godi, la'ifina endilisi ma nagiambamapa ma waf hianai bu'unai. I'i ine' nelafa waf Godi, anama la'ifina nagiambama ape' epes hiapai ma dei' mape etap nogota anae', ea' nigiambamapa owagama ilif heven wapoti'. ⁹Basef amae' endilisimi atoma epes hiesi si'i aho'ma seme'am sombale'efam amama na'ama.

¹⁰God anan ambal namunai napainai. Anan na'i nofa'ai amam nematawa hiesi sotanemani sope andeande'. Ea' dei' endilisi etis nefa'ai epes emi egafis sembale'efanai. Dei' mape mohafana ma'i endilisi nofa'apa. Amama atom dei' manda' maol lu'unai endilisi.

¹¹Ine' ni'ipasa basef amama mefe'mago esis amam nematawa niwalipas mehip silam. ¹²Esis sati ine' ukup ma'i, ine' ata' awomina, ea' ina ni'i aho'ma si'i ine' aman falafinai, owa'. Ine' nepe si'i ikwaf bu'unai ma esis Kristen sila waf bu'unai ine' nanda'anai ma fe' pe ki bale'ef ine'inai, noloma waf anama okom na'ina'ianai noloma waf bu'unai. ¹³Nogota anama ine' ata' nepe la'ela'ef nehafa ae', nenda' maol la'ifina ma nitalifa basef Godi alihiguma ma epes hiesi seme'am, ea' nefela ukup asasimi ma waf sonda'anai ni'ipasa basef Godi andeande'. ¹⁴Fowa' agufumi mumafi siosi mawamona lagofa ine'. Ambal Bu'unai Godi nafelam manda' betena ine' ea' anom amam ma'i basefa presen anama God nasi'inanai na'a. Dei' nenda' maol la'ifina nimafi presen anama andeande' God nali' nase'enana na'ai. ¹⁵La'ela'ef ine' nimafi maol anama la'ifina nepomana. Ama epes hiesi siti waf ine' nanda'anai netaga bo'ona. ¹⁶Nindumafuma andeande'ma waf ine' nanda'anai, ma basef amama niwalipasami. La'ela'ef nenda'am na'ama la'ifina. I'i ine' nenda'am na'ama, nambimb God nigiambamena neloma esis seme' basef ine' na'ipasami sailam, nofa'epa petanimani pepe andeande'.

Waf bu'unai nihi'amba amam nematawa ma waf bu'unai sienda'anai

5 ¹Ina nenda' megah moham amam hagami ni'ipam basef la'ifimi, owa'. Nepe so'uso'umbel ni'ipama basef Godi, ni'ipam si'i na'ipa ahalomena ine'inai. Ea' ni'ipa awomimi si'i na'ipa owapena ine'imi. ²Ni'ipa nematawa hagiwai si'i na'ipa mama'wena ine'ikwi. Ea' ni'ipa awiawai si'i na'ipa haniti'mina ine'ikwi ma waf bu'unai notaga bo'ona endilisi ma naep Godi.

Basef amama ma nematawa alifiwai

³Basefa nematawa alifiwai ma'i na'ama. Nematawa awama, i'i owa' enin epen numafiawa, ine' nimafiawa andeande'. ⁴I'i ano'w nemata'w alifi'wi enis awasi akwa'usi o bafasa'w akwa'usi sope esis ata' sogawa andeande' na'ama. Maol asasinai nali'i sumafi ahapas mamasas asasisi etis ata' sili' ma sogwa wiaf fowa' esis somafias. Esis sonda'am na'ama saila basef Godi. God okom na'iana endilisi waf anama. ⁵I'i ano'w nemata'w akwa'w ato'w kope alifi'wi, akwa'w kwanda'am na'ama. Ako'w kogawa endilisi God nambimb nigiangbama'w ma waf bu'unai, kofala God la'ela'ef owamb alipa beten akwa'unai. ⁶I'i ano'w nemata'w alifi'wi kwaila okom akwa'unai atona kwandagala ma alop atona kwanda' waf aonai, akwa'w si'i kwaga'i. ⁷Ine' nefela ukup nematawai ma wila basef amama ma onda' waf bu'unai, ma awau upe andeande'. Ama enin epen ina ni'ipawa ni'i awau wanda' waf aonai, owa'. ⁸Emi egafis owa' sumafi esis esimbel atom asasisi, esis ina nambimb simafi esis mamasas ahapas soloma batawisas. Epes isima sakwaha bale'ef sataga epes awasi endilisi sikila' isima owa' seambale'efa Godi.

⁹⁻¹⁰I'i anowa nematawa wahupawa maga'i, awau ina onda' so'a waol, owa'. Ope andeande'ma enis epes sotolowa si'i wape andeande'. Onda' maol bu'unai ma umafi batawisawa, ose'as gwa'aimi epes wigiambama esis Kristen wambota Godi, umafi awasi awausi andeande' ope onda' maol hianai bu'unai naninani ofe' ofe' otagama afagof 60-peleim, andeande'. Nematawa wanda'am na'ama atowa ine' nenda' agof awaumi mil okwatiha nigiangbamawa nese'awa gwa'aimi.

¹¹Ea' ine' owa' nenda' agofa nematawa awama awiawai alifiwai, owa'. Hapaiwai. Anona nemaf awau wi'i ugi'ma ukup awoumi ola alop awaunai atona wi'i oso' amam wapoti, ea' hapaiwai. Awau ukup amama mapaiwa, dei' wakwaha wafa basef bu'wami Kraisi fowa' ombale'efanai. ¹²Dei' wakwaha basef bu'wami la'ifimi fowa' wa'iam waloma Kraisi. Wanda' waf anama aonai, na'ama ofagema awaumi. ¹³Ea' anona waf awau wanda'ana wapoti'. Wanda' waf anama ala'uta nawa. Ea' wafe' wawis ifagw. Awau ina ala'uta nawa, owa'. Wakwalopa basef enis epesi wanda'am wafe'agon hi'alagon. Ea' wawalapa basef mamumami ina andeande'ma ape' mi'iam, owa'. ¹⁴Amama atom dei' a'i nematawa awama alifiwai ata' awiawai nambimb oso' amam wapoti' ma ola awasi umafias ope ifagw awaumi atom. Ae' a'i awau ina onda' anom amamaga awami motagama esis naumbih ma si'i anom basef awami ma ape', owa'. ¹⁵Ine' negawa, anowa nematawa wahupawa maga'i, wakwaha eaf bu'unai wafe' waila aman aonai Satan.

¹⁶I'i anona wambota nemata'w akwama akwa'w Kristen o anowa nematawa alifiwai ope, ea' nemata'w akwama Kristen kumafiawa.

Akwa'w konda'am na'ama ma esis sios ina sonda' maol sope somafiawa, owa'. Na'ama andeande'ma sios esis amam nematawa Godi sumafi nematawa alifiwai kwahuwai endilisi awau atowa wapani.

¹⁷Amam agufumi mumafi ipe' Kristen manda' maol andeande' endilisi, ipe' pinifelom penda'am andeande' pimafiam pese'am gwa'aimi maim bif etif mikila' peso' anom agufumi ma siosi. Agufumi manda' maol Godi mawalipasa basef ofagema Ananiami ipe' pimafiam na'ama etin andeande'. ¹⁸Basef mape Buk Baibeli ma'iam na'ama ma'i,

“Ine' owa' nesopama malogofa bulmakau manda' maol mafa'asa wit, owa'.”

Ea' anom basef wapoti' na'ama ma'i,

“Aman nanda' maoli anan nofa' anom amamaga tu'wanima maol anan nanda'anai.”

¹⁹I'i enin epen etitin ni'i, “Agilinai anama numafi esis Kristeni nonda' waf aonai, ine' owa' neme'anama basef ananiami, hapaimi. I'i epes bias o wenis si'i basef amama ma waf aonai anan nanda'anai, ine' neme'as.” ²⁰Ea' i'i anom agufumi monda' waf aonai, ine' ni'ipam basef la'ifimi ni'ipam naep esis Kristen hiesi. Nenda'am na'ama ma enis epes umbamohasa waf anama ma ina sonda'am na'ama.

²¹Ae' a'ipina andeande'ma naep Godi naloma Kraisi Jisas maloma amam ensel God nandandepami. Ine' nila basef amama andeande'. Ine' owa' ninifala anom amam awomimi ni'ipam mehipe. Ea' ina nenda' anom dembemi sa'ombemam ni'ipam so'umbel, owa'. Ni'ipa epes hiesi na'ama etin. Ina ninifala enis epes ea' nenda' enis alupusi sa'ombemas, owa'. Ni'ipas na'ama etin. ²²Ine' owa' nefa'anai anona aman mehipe nenda'ana nope agilinai ma esis Kristen, owa'. Nili' notolona andeande' nanda' waf bu'unai o nanda' waf aonai. Na'ama enis epes sitilina nigiangbama anona nanda' waf aonai, si'i ine' wapoti' nanda' waf aonai anan nanda'anai. Ine' nindumafuma nepe andeande'.

²³Ine' nekwaha waf anama na' embel wafimi atom. Andeande'ma nea' wain kwaie'una nigiangbama opaf ine'inai ma netofa awes la'ela'ef nanda'inai. ²⁴Waf aonai enis epes sanda'anai nape alihina esis nafe' nali'as sogawana alihina. Ea' waf aonai enis sanda'anai nape nandambaho', anona nemaf notaga nendawalap. ²⁵Ea' na'ama etin anona waf bu'unai wapoti' nape nandawalap. Ea' anona waf bu'unai nandambaho' ea' ina nandambaho' la'ela'ef, owa'. Anona nemaf nondawalap.

Basefa epes agof a'asi sanda' opeh na'a

6 ¹Ipe' Kristen agof a'epa panda' opeh na'a pape owina enis epes, ipe' ata' ukup mopoma na'ama. Dembemi mumafi ipe'i, ipe' pinifelom pi'i bu'wami pefela agof amamumi peme' basef amamumi. Ama enis

epes ina nambimb si'i basef awami ma agel Godi ma waf ipe' Kristen panda'anai, owa'. ²Ipe' agof a'epa panda' opeh na'a ma amam agufumi dembemi anom Kristen, ipe' ina ukup mope na'ama pi'i, "Anom Kristen sahopafa atom ea' hapaimi, osambala basef amamumi." Owa'.

Ipe' ukup mope na'ama pi'i, "Amom Kristen ea' afa' ukup mimilam, onda' maol amamunai andeande', ukula' maol wanda'ama amam agufumi owa' Kristeni." Dei' main, ipe' agof a'epa pagiambama amam Kristen ipe' ukup maimailami.

Timoti, basef amama ine' niwalipasam nefela ukup asasimi nenda'as sotaga la'ifis.

Waf endilisinai ma sefa' amamaga hiami

La'ela'ef ine' niwalipa esis amam nematawa ma sonda' waf bu'unai, ea' nefelasa sonda'am. ³⁻⁴Basef dembinai Jisas Kraisi mawalipapa andeande'ma waf Godi. I'i anona aman nokwaha basef amama ma nowalipa esisa anom basef owa' mefe' dende'ma basef amama bu'wami Jisasi, ape' mogawa aman anama na'i nosambala basef Godi. Anan ina nogowa andeande', owa'. Anan nomonas a'anai. Anan okom na'i basef nalomas sandahihianama. Sa'i basef amama, nafitap nalomasa basef amama ofagema. Basef amama atom mawalapa waf anama. Opalef aoma enis epes, sanda' findiwa ma sope ukup aom mopoma sahin owan. ⁵Epes isima sanda' na'ama, ukup asasimi mahaga magaol endilisi ea' ina sombale'efa basef bu'wami endilisimi, owa'. Ea' sa'i basef sapa'am sandahihianama saloma enis. Ea' sa'i, "Eaf anama Godi eaf sofa' otambanai."

⁶Endilisi, emi egafis sila waf Godi ma esis ukup mopoma amamaga asasimi si'i, ea' ma'um dende'ma ape', opalef asasimi mape awanem mape andeande'. ⁷Ape' mogawa, mamalapa olapa mataga etap anae', nemaf anama ape' ina mofa' anom amamaga mafi'i, owa'. Anona nemaf moga' wapoti' ina mofa' anom amamaga mefe' molomapa mokwaha etap anae', owa'. ⁸Ea' anom gwa'aimi luwaguf maim mo'omapa, ape' mi'iam mi'i, "Ea' ma'um amama ea' dende'ma ape'."

⁹Ea' epes ukup ma'i sofa' otamba maim hiami, esis anona nemaf amama meagwambipai motagamas sowa ma sonda' waf aonai, si'i huguf sandowam sambaho'wam mapoma mafis ma mofe' mowala mope seaham. Ea' nambimb ukup mamumami awami motagamasa amamaga awami monda' esisa ukup mose'as hegililas owa'etin. ¹⁰Waf anama ukup ma'i otamba endilisi, ofagema ma waf hianai aonai. Enis epes ukup lu'um ma'ima'i otamba endilisi, waf anama nambomas sakwaha sombale'efa God safe'ma waf aonai. Ea' sofa' nimanimi lu'wami endilisi.

Ine' nihapila ambal namunai la'ifina nepe la'ela'ef

¹¹Ea' ine' aman Godi newa' alafugama amamaga amama ea' nefe' nila waf anama bu'unai. Nenda' maola nefa' waf bu'unai endilisinai Godi, nembale'efa Jisasa okom ninila epes hiesi. Nenda'am na'ama ma nitu la'ifina ma waf aonai

enis sonda'menanai. Ine' nenda' waf so'uso'umbela enis epes. ¹²Nembale'efa Kraisi sil'i enin epen nasagih mehip naloma enis. I'i enin nesagih mehip nefe' nisila'as, nefa' anom amamaga. Ine' wapoti' na'ama etin. I'i nembale'efana la'ifina, anona nemaf nepe andeande' la'ela'ef. Ine' nihapila okom anama ambal bu'unai nape la'ela'efi fowa' God nofalena ma nefa'anai. Anan nofalena nemaf anama ma newalapa bale'ef anama ine'inai naep epes hiesi sanda' lotuma Godi. ¹³⁻¹⁴God nase'am ambal namunai hiahaom hiami maloma epes. Afagel nali'i Jisas Kraisi nawalapa basef ofagema endilisimi andeande'ma naep Pontius Pailat gavman dembinai. Naep Godi naloma Jisas Kraisi dei' a'ipina basef la'ifimi na'ama. Nila basef bu'wami Godi nimafi esis amam nematawa Godi andeande'. Ine' nenda'am na'ama. Ine' nimafi okom ine'inai andeande' nila basef amama Godi andeande' waf aonai owa' nopeina, ea' epes ina sonda' findiwa ma basef amama. Nimafiam nepe na'ama etin nefe' netaga ma nemaf anama Dembinai ape'inai Jisas Kraisi notaga alihina. ¹⁵Nemaf anama God na'ianai nosapa'ana nifi'i. God atona ofagonama danifel, anan atona Dembinai King numafi epes hiesi soloma amamaga hiami hi'alam. Anan king ma king hiami, Dembinai ma dembemi hiami. ¹⁶Ea' anan atona owa' neaga'i, nape nafifili lu'unai endilisi. Ea' ape' dei' ina la'ifipama mefe' felefele'ma anan, owa'. Dei' enin epen owa' neatolonai. Owagama wapoti' owa' enin epen la'ifina neati Anan, owa'. Ae' a'i agel ananinai lu'unai noloma pepel Ananinai nopoma Anan atona la'ela'ef. Endilisi.

Basef amama ma esis amamaga hiamisi

¹⁷Ine' ni'ipa epes isima amamaga hiamisi ma etap anae' ina sosambala basef endilisimi sombale'efa amamaga amama mamumami hiami anona nemaf motaga aom endilisi, owa'. Ine' ni'ipasa sombale'efa God endilisi andeande'. Anan atona nase'apai amamaga hiami bu'wami manda' ukup ape'imi mataga bo'om mandanifel. ¹⁸Ine' kipa epes isima amamaga hiamisi, sonda'ama sigiambama maol bu'unai. Esis la'ela'ef sowaloga amamaga asasimi soso' enis epes. ¹⁹I'i sonda'am na'ama, andeande'ma anona nemaf sokolasa amamaga bu'wami atom migiambamas owagama gani heven. Sonda'am na'ama, sofa' ambal bu'unai endilisi.

Ine' nimafi maol ine'inai andeande'

²⁰Nogalome Timoti, ine' nindumafuma nimafi basef amama God nasi'inami andeande'. Newa' alafugama basef amama baso'maimi wafimi sa'i basef gawaimi. Basef amama ma'i mohambombaga waf Godi. ²¹Enis epes sombale'efa basef amama baso'maimi sa'i, "Ape' mogawai." Ea' dei' sakwaha sombale'efa God sahaga sogaol sapan.

Ae' a'i God nigiangamepa na'a ipe' hipei.
Ea' ma'um.